

## ※九年級上學期

### 第三週 9/11~9/15

相見歡

【南唐】李煜

無言獨上西樓，月如鉤，  
寂寞梧桐深院鎖清秋。  
剪不斷，理還亂，是離愁，  
別是一番滋味在心頭。

### 第四週 9/18~9/22

虞美人

【南唐】李煜

春花秋月何時了？往事知多少。  
小樓昨夜又東風，  
故國不堪回首月明中。

雕欄玉砌應猶在，只是朱顏改。  
問君能有幾多愁？  
恰似一江春水向東流。

【注釋】

- ①了：了結，完結。
- ②砌：台階。
- ③雕欄玉砌：指遠在金陵的南唐故宮。
- ④朱顏：青春年華，指自己的容顏。
- ⑤君：作者自稱。

### 第五週 9/25~9/28

相見歡

【南唐】李煜

林花謝了春紅，太匆匆，  
無奈朝來寒雨晚來風。  
胭脂淚，留人醉，幾時重？  
自是人生長恨水長東。

【注釋】

- ①胭脂淚：指女子的眼淚。
- ②幾時重：何時再度相會。

### 第六週 10/2~10/6

水調歌頭

【宋】蘇軾

明月幾時有？把酒問青天。不知天上宮闕，今夕是何年？我欲乘風歸去，唯恐瓊樓玉宇，高處不勝寒。起舞弄清影，何似在人間？轉朱閣，低綺戶，照無眠。不應有恨，何事長向別時圓？人有悲歡離合，月有陰晴圓缺，此事古難全。但願人長久，千里共嬋娟。

【注釋】

- ①闕：帝王的住所。
- ②瓊：美好的。
- ③瓊樓玉宇：月中宮殿。
- ④轉朱閣：月光照遍了華美的樓閣。
- ⑤低綺戶：低低照進雕花的門窗裡。
- ⑥嬋娟：美麗的月亮。

### 第九週 10/23~10/27

定風波

【宋】蘇軾

莫聽穿林打葉聲，何妨吟嘯且徐行。竹杖芒鞋輕勝馬，誰怕！一蓑煙雨任平生。料峭春風吹酒醒，微冷，山頭斜照卻相迎。回首向來蕭瑟處，歸去，也無風雨也無晴。

【注釋】

- ①蓑：指蓑衣，蓑草編成的雨衣。
- ②料峭：形容春寒。
- ③蕭瑟：此指風雨淒涼。

### 第十週 10/30~11/3

江城子乙卯正月二十日夜記夢

【宋】蘇軾

十年生死兩茫茫，不思量，自難忘。千里孤墳，無處話淒涼。縱使相逢應不識，塵滿面，鬢如霜。  
夜來幽夢忽還鄉，小軒窗，正梳妝。相顧無言，唯有淚千行。料得年年斷腸處，明月夜，短松岡。

## 第十一週 11/6~11/10

蘇幕遮

【宋】范仲淹

碧雲天，黃葉地，秋色連波，波上寒煙翠。山映斜陽天接水，芳草無情，更在斜陽外。黯鄉魂，追旅思，夜夜除非，好夢留人睡。明月樓高休獨倚，酒入愁腸，化作相思淚。

## 第十二週 11/13~11/17

醜奴兒

書博山道中壁  
【宋】辛棄疾

少年不識愁滋味，愛上層樓。  
愛上層樓，為賦新詞強說愁。  
而今識盡愁滋味，欲說還休。  
欲說還休，卻道天涼好個秋！

## 第十五週 12/4~12/8

青玉案

元夕  
【宋】辛棄疾

東風夜放花千樹，更吹落，星如雨。寶馬雕車香滿路。鳳簫聲動，玉壺光轉，一夜魚龍舞。  
蛾兒雪柳黃金縷，笑語盈盈暗香去。眾裡尋他千百度，驀然回首，那人卻在，燈火闌珊處。

【注釋】

①驀然：忽然。②闌珊：衰落、微暗的樣子。

## 第十六週 12/11~12/15

醉花陰

【宋】李清照

薄霧濃雲愁永晝，瑞腦銷金獸。  
佳節又重陽，玉枕紗廚，半夜涼初透。  
東籬把酒黃昏後，有暗香盈袖。  
莫道不銷魂，簾捲西風，人比黃花瘦。

## 第十七週 12/18~12/22

一翦梅

【宋】李清照

紅藕香殘玉簟秋，輕解羅裳、獨上蘭舟。  
雲中誰寄錦書來？雁字回時、月滿西樓。  
花自飄零水自流，一種相思、兩處閒愁。  
此情無計可消除，才下眉頭、卻上心頭。

## 第十八週 12/25~12/29

聲聲慢

【宋】李清照

尋尋覓覓，冷冷清清，淒淒慘慘戚戚。  
乍暖還寒時候，最難將息。  
三杯兩盞淡酒，怎敵他、晚來風急！  
雁過也，正傷心，卻是舊時相識。

滿地黃花堆積，憔悴損，而今有誰堪摘？  
守著窗兒，獨自怎生得黑！  
梧桐更兼細雨，到黃昏，點點滴滴。  
這次第，怎一愁字了得！

## 第十九週 1/2~1/5

滿江紅

【宋】岳飛

怒髮衝冠，憑欄處、瀟瀟雨歇。  
抬望眼，仰天長嘯，壯懷激烈。  
三十功名塵與土，八千里路雲和月。  
莫等閒，白了少年頭，空悲切。

靖康恥，猶未雪；臣子恨，何時滅？  
駕長車，踏破賀蘭山缺。  
壯志飢餐胡虜肉，笑談渴飲匈奴血。  
待從頭，收拾舊山河，朝天闕。

【注釋】

①天闕：京都，帝王所居的帝宮。